

王了一文集

吳寧王文圖著

序文類

△了一自序

了一者，文圃晚年別號也，現年六十有六，尙未了向平之願，因有感於一了百了之意，因以爲號者也，溯七歲就外傳，與羣童角逐於一堂，無以異也；迨志學之年，從子屏先生遊，命習舉子業，作破題兒，卽見賞於先生，且曰：孺子可教，而稱道弗衰，越年餘，入股文成篇，赴縣試，列前茅，終以文氣穉弱，敗北文壇，自知揣摩之功，殊少鍛鍊，乃改從李鏡及夫子遊，侍從左右，趨步三年，清光緒癸卯，書兄昂青中經魁，夫子詔諸弟子曰：余衰老，明年不設館授徒，爾等各擇良師以圖上進，諸同學懇求再三，固辭，不得已，文圃等赴城

內徐子潮先生處，贊見求學，一見如故，是年窗友，數達而立，優秀分子也多，縣府試列十名內者有人，終覆者尤有人，屆院試提覆者四人，入泮二，不入泮亦二，文圃其一也。當時奉旨停考令下，同學入泮者，固興高彩烈，無暇精益求精，即見棄於陳大宗師者，亦多如鳥獸散，無心再來求學；惟文圃根觸末路功名，得失無關榮辱，雖名落孫山，進身之階，有學堂在，仍進舊館，溫故研新，以資深造，不多時金郡中學招生嚮太守行文下縣，縣令布告招生，投考者千餘人，歷試三場，幸皆中選，由縣令送考金郡中學，試驗各科，亦合格，乃遂肄業焉。進校後，作文班中常第一，頗得黃志璠先生嘉許，越六學期如一日。浙省當局，覺科舉已停，提倡新學，應先培植專科師資，乃廣招優秀分子，無論廩貢生，或增附生，以及學校畢業，或中學肄業，均得與考，考生之多，得未曾有，文圃參加第二次考試，發榜果有其名，而私心竊喜，得遂求學之志，而爲人師矣。語曰：『人之患，在好爲人師，一文圃三復斯言，兢兢業業，不敢或怠，又自覺中學未

卒業，普通常識未充實，先入預科，再選博物科肄業，對於各科研究，不遺餘力，以期無負於父兄。畢業後，遂服務於廣益小學，吳一公先生爲之長，吳先生以東陽讀書種子多，非創辦縣中不可，乃與文圃蹉商，上書支提學使，無如調高和寡，影響不大，而創辦縣中之動機，已萌芽於此，未幾縣參議會議長施公雲如，縣議會議長吳公味菊，開聯席會議，決議創辦縣中，以官小學舊址爲校舍，擴充教室四，宿舍若干，於民國二年二月間，公推趙芷津先生爲校長，招生百名，四月開學，文圃卽被聘爲博物教員，至民七一月，同學吳吟風先請生，調往浙江省立七中，任教職九年餘，民十六八月，仍回東中，翌年春，校長盧輝玉辭職，縣委文圃代理，張廳長與文圃雖有師生關係，不進廳謁示，而在校中整理一切，鄙意欲待賢者來長斯校也，不久果有同學葛樹棠先生，自南京回浙，廳方委其來長東中，到校晤談，文圃喜形於色，以爲可以卸此重任也；乃信手交付校鈴與簿冊，仍爲教職如故，迄今尙戀棧於此，無多貢獻，顏亦厚矣！但對於課業，非萬不

得己，不請假一小時，畢生以服務爲目的，不以陞官發財爲前題，故能一心任教東中，爲終身事業，文圃授徒，雖無良法表見，而學生信仰，尙能中心誠服，此則可告無罪於父老，而實獲我心者也，今老矣，無能爲也矣，總檢前後事業，未獲善果，不能不慨夫勞碌一生，未能了却所欲，且年近從心，而事往往不克從心，致有感乎呱呱墮地，赤身而來，歸真返樸，又是空手而往，胡爲乎憧憧擾擾，爲子孫計繁榮？盍不循天理，絕人欲，修身立道，以收真果乎？此乃清夜自思，而有愧於心，欲了俗緣而不能了，此了一之別號所由來也。是爲序。

中華民國三十有五年五月六日序於東中

▲城北徐曉江先生七旬壽序

仁爲壽本，德乃福基，因果之相循，若環之無端，積德在身，而食報於後，理有然也。夫修道有常規，報應無定期，凡事之在於己者，可必，操諸人者難期；道德文章，造就之功在己，富貴功名，予奪之